

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Tasiilami eqqaanilu suliffissaaleqinerit annikillisarnissaannut, suliffissaqartitsinissamut, aammalu pilersuinissamut isumannaallisaanissamut Naalakkersuisut iliuusissatut pilersaarummik suliaqaqqullugit peqquneqarnissaannik Inatsisartut aalajangiiffigisassaattut siunnersuut. Iliuusissatut pilersaarut upernaakkut 2027-mi ingerlanneqaleriissaaq.

(Inatsisartunut ilaasortaq Gerth Mikaelson, Naleraq)

Tunngavilersuut:

Sumiginnaanerit immikkoortitsinerillu akuersaarneqarunnaarlik.

Nunatsinni suliffissaaleqiffinni Tasiilaq annertunerpaanngikkuni annertunerpaanut ilaavoq. Tamanna inuinit tikkuartuutigiinnarneqarsinnaanngilaq, oqartussatsinniimmi immikkoortitererpalaartumik iliuuseqartitsinnginnernut aamma patsisaaqataavoq.

Tasiilaq sumilluunniit ilinniartinnik assigisaanilluunniit peqanngilaq, naak illoqarfiit minnerungaatsiartut arlallit peqartut, soorlu Narsami inuussutissalerinermut ilinniarteqarput, Qasigiannguani efterskole-qarput il. il.

Tamassuma saniatigut ingerlatsiviit inuiaqatigiit pigisaat suliffissanik matooraapput, soorlu Tusass A/S orniguffigisinnaasamik pisiniarfeeruppoq, naak Tusass A/S ukioq 2024-imi 170 mio. kr. sinneqartoortoq.

Tasiilaq illoqarfik maanna 2000 ataallugit inoqalerpoq, inuerukkiartuinnarlunilu.

Aaqqiissutissavimmik iliuuseqartoqanngilaq. Taamaammat Naalakkersuisut iliuusissatut pilersaaruteqarnissaannik pilersitseqqusariaqalerpagut.

Iliuusissatut pilersaarummi qanorluunniit ilanngunneqassapput:

- Tasiilami eqqaanilu suliffissaaleqinerup annikillisarnissaannut iliuusissaasinnaasut
- Tasiilami eqqaanilu suliffissanik pilersitsinissamut iliuusissaasinnaasut
- Tasiilami eqqaanilu nerisassanik pisiassanillu nunguutsisanngitsumik pilersuisinnaanissamut qulakkeerinninnissamut iliuusissaasinnaasut



Nunatta Kangia inuilu immikkoortillugit sumiginnaannarsinnaanngillat, iliuseqartariaqalerpugut.

Pisortanut aningaasatigut allaffissornikkullu kingunerisassat

Pilersaarusiornermut aningaasartuutit nalinginnaasumik ukiumut 500.000 koruunit missaanniipput. Siunnersuut akuerineqarpat pisortat aningaasartuutaat ikinnerulissapput amerlanerusut sulilerpata, taamaalillunilu isumaginninnikkut ikiorsiissutit ikilissapput akileraarutigullu isertitat amerleriarlutik.

Namminersorluni inuussutissarsiuteqarnermut aningaasatigut allaffissornikkullu kingunerisassat

Aalajangiiffissatut siunnersuutip akuerineqarnerani Namminersorluni inuussutissarsiuteqarnermut aningaasatigut allaffissornikkullu toqqaannartumik kingunerisassaannik soqanngilaq.

Innuttaasunut aningaasatigut allaffissornikkullu kingunerisassat

Aalajangiiffissatut siunnersuutip akuerineqarnerani innuttaasunut aningaasatigut allaffissornikkullu toqqaannartumik kingunerisassaannik soqanngilaq.